


**TEZAU LITURGIC**  
**16 IANUARIE**

**SLUJBA**  
**SF. PREOT-MUCENIC**  
**IOAN PETAIU**  
**DE LA VALGA**



**MOSCOVA, 2000**



## Служба священномученику Иоанну пресвитеру, во граде Валга убиенному

На Господи, возвах: стихирь, глас 8:  
Радуйся, пастырю Христов Иоанне, / ты бо  
горния силы мучением своим возвеселил еси, /  
нам же на земли праздник добропобеднаго  
твоего преставления даровал еси, / в немже  
страдания твоя прославляюще, / яже за Церковь  
Божью претерпел еси, / славословим Христа,  
Бога нашего, / даровавшаго нам ходатая и  
молитвенника о душах наших.

Радуйся, страстотерпче Христов Иоанне! / Ты бо  
кровию твоею честною землю нашу освятил еси,  
/ и венец нетленный от руки Господней приял  
еси, / не от камней честных украшен, / но  
твоею кровию прозябен. / Темже молися Христу  
Богу / даровати душам нашим мир и велию  
милость.

Радуйся, священномучениче Иоанне, / иже во  
времена гонений лютых / от безбожников  
неповинно убиенный, / за распятаго и  
воскресшаго Христа, / и ныне росы небесныя  
наслаждающийся, / и благоухания рая

исполняющийся, / и лицезрения божественныя доброты насыщающийся; / темже моли Спаса нашего умирить мир и спасти души наша.

Слава, глас 6:

Страстотерпче новый, / священномучениче Иоанне, / во граде Валга смерть за Христа претерпевый, / тя бо яви Господь предстателя о пастве земли Эстонския, / поминай нас, чтущих святую память твою, / да избавимся бед и скорбей молитвами твоими.

И ныне, Богородичен.

Тропарь священномученику, глас 4:

Благодать иерейства от руки священномученика восприял еси / и по триех месяцах служения кровь свою за Христа пролиал еси, / страстотерпче отче Иоанне, / во граде Валга неповинно убиенный, / якоже и архипастырь твой жертвою непорочною оказался еси, / молися Христу Богу нашему, / да спасет души наша, яко милосерд.

Слава и ныне, Богородичен.

Канон, глас 6.

Песнь 1

На степень священства в годину лютую возшел еси, священномучениче Иоанне, отложивши

боязливость и маловерие, и прият сердцеводец  
Господь дерзновение твое, вселив тя во обители  
радости нескончаемья.

Скончал еси житие твое мученически, пастырю  
Иоанне, жребия високаго от Господа  
удостоившись, и пребываеши ныне тамо,  
отонудуже отбеже всякая болезнь, печаль и  
воздыхание.

Пострадал еси на земли вмале, узы неправедные  
и убиение от безбожников претерпев, и  
наследовал еси за горечь кратковременную  
блаженство неизреченное и веселие вечное.

Богородичен: Украшена добротою чистоты, Дево  
Мати, добротворнаго благолепия жилище  
бывши: темже Тя поем и превозносим, Чистую,  
во вся веки.

### Песнь 3

Служитель престола Божия славный, ризы  
кровию своею украсивый и благодать  
священства мученичеством умноживый,  
страстотерпче Иоанне, молися Господеви о  
почитающих святую память твою.

Лику мученическому сопричисленный, жертвою  
непорочною явился еси, святе Иоанне, буди  
молитвенник теплый и предстатель  
непостыдный о душах наших.

За веру Православную и Церковь Божию от

безбожников убиенный, чаше Гефсиманстей приобщивыйся, един от великаго сонма страдальцев Господних явивыйся, не забуди паствы твоея, священномучениче преславный. Богородичен: Яко врата, вводящая к божественному входу, яко добровосходную лествицу Божию, яко спасающимся незаблудную Наставницу, обрадованную воспоим Деву Марию.

#### Седален:

Скончал еси житие твое мученически, убиен быв Истины ради, Еяже служителем яви тя Господь. Ни единыя вины обретше противу тя гонители твои, токмо риз пастырских ради злобу свою излиавши на тя, не терпяще самага имене Христова. Ты же, яко агнец незлобив, кротко вся претерпел еси и достоинства иерейскаго ничимже посрамил еси.

#### Песнь 4

Аще не сан твой иерейский, священномученниче Иоанне, не бы убиен был еси от руки гонителей Церкви Христовы. Темже поминай нас у престола Божия пастырскою твоею молитвою. Хиротонию от священномученика Платона восприял еси, отче Иоанне, и ныне вкупе с ним и прочими новомученики ходатайствуеши о

роде нашем. Сего ради ублажаем тя и почитаем священную память твою.

По триех месяцах служения твоего восхищен был еси от многомятежнаго мира сего, пастырю наш Иоанне, испроси и нам, грешным, у великодаровитаго Бога безбедно преплыти житейскаго моря пучину и достигнути тихаго пристанища спасения.

Богородичен: Закона сени преидоша рождеством Твоим, истина возсия, благодать даровася, Богородице: темже Тя величаем.

### Песнь 5

Освятися град Валга мученическою кровию твоею, священномучениче Иоанне, сего ради наполнишася души наша радостию и веселием, яко дарова нам Господь молитвенника во утешение и спасение душ наших.

Ни единыя вины обрете в тебе истязатели твои, отче наш Иоанне, обаче убиен бысть от них креста ради Христова, егоже на персех своих носил еси. Сего ради почитаем святую память твою.

Ныне возвеселися град Валга и вся земля Эстонская в памяти твоей, Иоанне страстотерпче: приял еси жребий высокий, убиен быв за веру Христову, сего ради во веки ублажаешися.

Богородичен: С мученики, Чистая, с божественными пророки и со всеми ангелы, Зиждителя всех моли спасти верою Тя славящих и величающих.

### Песнь 6

Се простер тебе Христос победы венец, страстотерпче отче Иоанне, егда убиваху тя гонители Церкви Христовой. Промыслом бо Его, избежавши многих скорбей земнаго пути, удостоился еси вселения со всеми святыми. Звезда малая явился еси, лучами мученичества сердца верных просвещая, темже ныне со ангелы водворяясь, спасай нас молитвами твоими, совершающих честную память твою. В спасительную одежду, прехвальне Иоанне, божественнаго веселия одеявся, мученичества венец от Бога приял еси, честная града Валга и земли Эстонския похвало.

Богородичен: Ленистю жизнь мою иждив, Пречистая, к Твоему притекаю заступлению, ущедривши, спаси мя.

### Кондак, глас 3:

Страстотерпче отче Иоанне, / служителю Церкви Христовой, / кровию своею землю нашу освятивый, / Богови принесеса, яко жертва непорочная, / заклан был еси за имя Спасово, /

во утверждение веры православныя, / во еже  
выну просвещатися нам светом евангельским.

### Песнь 7

Ныне град Валга хвалится, яко дарова Господь  
утешение малому стаду Своему, молитвенника,  
на небесех живущаго и на земли во останках  
честных почивающаго.

Единому Владыце Христу на земли работати  
возжелел еси, блаженне Иоанне, в годину лютую  
пастырский крест восприим , сего ради  
возмездие от Бога восприял еси, еже на небесех  
жительствовати со ангелы вкупе и со святыми.  
Утешение в скорбех своих вем тя, Иоанне  
священномучениче, сего ради в памяти твоей к  
предстательству твоему прибегах, да не  
презриши мя окаяннаго, требующа твоея  
помощи.

Богородичен: Небесная врата воспоем  
Богородицу, имиже входят вси грешнии ко  
входом прощения.

### Песнь 8

Христову престолу предстоя,  
священномучениче, не престай молитися о стаде  
твоём и о всех, с верою притекающих к тебе, да  
молитвами твоими получим спасение и от  
всяких бед и скорбей избавление.

Кто изочтет премудрость Божию или кто уразумеет непостижимыя пути Его?

Недоумением объяти, зрим бо днесь пастыря Иоанна, по триех месяцах служения гонителями убиеннаго и ныне в лике святых водворившагося.

Во благоговении и умилении сердец взирающе на кончину твою, отче Иоанне, в молчании помыслов совершаем священную память твою. Богородичен: Святая Мати Божия, оскверненное сердце мое деянии нечистыми молитвами Твоими очисти.

### Песнь 9

Шествия и стези твоя направишася ко Христу, всех Богу и Господу, Емуже в руце дух твой предал еси, мучениче страстоносче Иоанне блаженне.

Яви тя Господь, пастырю Иоанне, одинаго от новомученик, иже в последняя лета ко Христу кровьми своими пришедших и ныне на небесех молящихся о спасении душ наших.

И ты, земле Эстонская, ничимже меньше еси прочих стран православных, в тебе бо просия сонм угодников Божиих, из нихже священномученик Иоанн, во граде Валга пострадавший, ныне нами достойно ублажается.

Богородичен: Просвети мя омраченнаго грехи,  
безстрастия Свет рождшая: яко да пою Тя,  
чистая Приснодево.

